

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPĆINSKI SUD U SARAJEVU
Broj: 65 0 St 1178275 25 St
Sarajevo, 10.06.2026. godine

Općinski sud u Sarajevu, stečajni sudija Nebojša Joksimović, u stečajnom postupku nad imovinom stečajnog dužnika Društvo sa ograničenom odgovornošću za promet i usluge "ČOKOS" d.o.o. Sarajevo, ul. Terezije bb privredni grad Skenderija, Sarajevo, Sarajevo-Centar, van ročišta dana 10.06.2026. godine donio je:

R J E Š E N J E

OTVARA SE stečajni postupak nad imovinom stečajnog dužnika Društvo sa ograničenom odgovornošću za promet i usluge "ČOKOS" d.o.o. Sarajevo, ul. Terezije bb privredni grad Skenderija, Sarajevo, Sarajevo-Centar.

Za stečajnog upravnika se imenuje se Bajramović Sead iz Sarajeva.

Određuje se upis zabilježbe rješenja o otvaranju stečajnog postupka u sudskom registru Općinskog suda u Sarajevu u matičnom registarskom broju subjekta upisa broj 65-01-1020-17.

Zbog nedostatka stečajne mase za pokriće troškova stečajnog postupka ovaj stečajni postupak se neće provoditi, te se isti i ZAKLJUČUJE.

Nakon pravosnažnosti ovog rješenja isto će se dostaviti Odjeljenju registra privrednih subjekata Općinskog suda u Sarajevu, radi brisanja stečajnog dužnika u matičnom registarskom broju subjekta upisa broj 65-01-1020-17.

Troškovi stečajnog postupka padaju na teret stečajnog dužnika.

Ovo Rješenje će se objaviti u "Službenim novinama FBiH", na oglasnoj tabli suda, web stranici suda-elektronskoj tabli suda i na internet stranici FIA-e.

O b r a z l o ž e n j e

Rješenjem ovoga suda broj gornji od 02.10.2025. godine pokrenut je prethodni postupak radi utvrđivanja uslova za otvaranje stečajnog postupka nad imovinom privrednog društva Društvo sa ograničenom odgovornošću za promet i usluge "ČOKOS" d.o.o. Sarajevo, ul. Terezije bb privredni grad Skenderija, Sarajevo, Sarajevo-Centar, , te je za privremenog stečajnog upravnika imenovan Sead Bajramović iz Sarajeva. Navedeno rješenje je objavljeno u Službenim novinama F BiH broj 79 od 15.10.2025. godine i izvršeno javno oglašavanje putem oglasne table suda.

U prethodnom postupku privremeni stečajni upravnik je dana 10.12.2025. godine dostavio Izvještaj u kojem je, pored ostalog, naveo da postoje zakonski razlozi za otvaranje stečajnog postupka nad imovinom stečajnog dužnika Društvo sa ograničenom odgovornošću za promet i usluge "ČOKOS" d.o.o. Sarajevo, ul. Terezije bb privredni grad Skenderija, Sarajevo, Sarajevo-Centar, te je u istom naveo da s obzirom da društvo nije u mogućnosti da izvršava svoje dospjele novčane obaveze neprekidno u trajanju preko 60 dana, da su se stekli zakonski razlozi za otvaranje stečajnog postupka, da ne postoje uslovi da se nastavi poslovanje djelimično ili u cijelosti, niti uslovi za moguću

reorganizaciju društva, da društvo nema pokretne niti nepokretne imovine čijim bi se unovčenjem mogli pokriti svi troškovi stečajnog postupka i djelimično namiriti povjerioci stečajnog dužnika, te da su se stekli uslovi za otvaranje stečajnog postupka.

Na ročištu održanom dana 16.01.2026. godine stečajni upravnik je izvršio dopunu svog Izvještaja od 10.12.2025. godine, te naveo da su dana 05.02.2025. godine, društvo Una Wood d.o.o. i Mirsad Čoković zaključili Ugovor o pristupanju dugu, kojim pristupaju dugu društva Čokos d.o.o. Sarajevo i Senada Čokovića prema BBI Banci, odnosno pristupaju dugu po osnovu Okvirnog sporazuma od 10.10.2022. godine, odobrenom na iznos od 750.000,00 KM. U članu 2. predmetnog ugovora jasno je navedeno da je iz Okvirnog sporazuma na dan zaključenja ugovora o pristupanju dugu proistekao Ugovor o reprogramiranju finansijskih obaveza broj 1413068050103684 od 17.07.2024. godine, za koji mu je dostavljen otplatni plan. Prema tom planu, izloženost društva Čokos d.o.o. na dan zaključivanja ugovora iznosila je cca 640.000,00 KM. Nadalje je naveo da je prema finansijskim izvještajima na dan 31.12.2024. godine, društvo Čokos d.o.o. Sarajevo imalo evidentiranu: dugoročnu imovinu ukupno 413.988,00 KM, i to: Postrojenja, oprema i namještaj: 345.721,00 KM i Transportna sredstva: 68.267,00 KM, ali da prema bilansima na dan 02.10.2025. godine, kao dan donošenja rješenja o prethodnom stečajnom postupku, navedene pozicije dugoročne imovine iskazane su u iznosu od 0 KM. Naveo je i to da je kratkoročna imovina u ukupnom iznosu od ukupno 394.341,00 KM, i to: Sirovine, materijal, rezervni dijelovi i sitan inventar: 5.882,00 KM i Gotovi proizvodi: 279.809,00 KM. Na dan 02.10.2025. godine Pozicija 1.1. iskazana u iznosu od 0 KM i Pozicija 1.3. gotovi proizvodi iskazana u iznosu od 92.634,00 KM, te da je razlika u imovini između stanja na 31.12.2024. i 02.10.2025. godine nastala je zbog činjenice da je društvo Čokos d.o.o. isknjižilo predmetnu imovinu, budući da je ista na temelju izdatih faktura i zaključenih ugovora prenesena na društvo Una Wood d.o.o.. Prema zaključenim ugovorima, plaćanje se je izvršilo prebijanjem međusobnih obaveza, odnosno zatvaranjem dijela duga koji društvo Čokos d.o.o. ima prema društvu Una Wood d.o.o. po osnovu ugovora o pristupanju dugu od 05.02.2025. godine. Sve fakturisano je po knjigovodstvenoj vrijednosti imovine, odnosno nije rađena procjena vrijednosti te imovine.

Prema odredbama Zakona o stečaju, radnje koje su omogućile nekom stečajnom povjeriocu osiguranje ili namirenje a koje se poduzmu u periodu od 12 mjeseci prije podnošenja prijedloga za otvaranje stečajnog postupka, a koje dovode do umanjjenja ili otuđenja imovine dužnika, mogu biti predmetom pobijanja, ukoliko je očigledno da su poduzete s ciljem osiguranja prava određenih lica na štetu drugih povjerilaca.

U konkretnom slučaju, prenoseći imovinu na društvo Una Wood d.o.o. radi prebijanja međusobnih obaveza, društvo Čokos d.o.o. je znatno umanjilo raspoloživu imovinu, što potencijalno može biti predmet pobijanja radnji dužnika pred nadležnim sudom.

Kako društvo Čokos d.o.o. nema raspoloživu imovinu za pokrivanje troškova vođenja stečajnog postupka, predložio je da neki od povjerilaca, koji ima interes da se otvori stečajni postupak i pokrene postupak pobijanja dužnikovih radnji, na poziv suda predujmi troškove stečajnog postupka.

U toku prethodnog postupka advokat Nejra Suljić je kao punomoćnik društva TABCO d.o.o. Podneskom od 29.12.2025. godine obavijestila sud da je društvo TABCO d.o.o. podnijelo tužbu ovome sudu protiv društva ČOKOS d.o.o. Sarajevo, radi duga, dok je Podneskom od 07.01.2026. godine obavijestila sud da je kao punomoćnik društva TABCO d.o.o. podnijela krivičnu prijavu dana 30.12.2025. godine protiv Čoković Senada i društva ČOKOS d.o.o. Sarajevo radi krivičnog djela oštećenje povjeritelja, prouzrokovanja stečaja i lažni stečaj.

Nakon ročišta održanog dana 16.01.2026. godine, na kojem su na raspravnom zapisniku konstatovani Podnesci advokata Nejre Suljić od 29.12.2025. godine i 07.01.2026. godine sud je cio spis dostavio Kantonalnom Tužilaštvu Kantona Sarajevo radi provjere navoda istaknutih u podneku advokata Nejre Suljić od 07.01.2026. godine.

Kantonalno Tužilaštvo Kantona Sarajevo je cio spis uz dopis ovoga suda zaprimilo dana 21.01.2026. godine, te uz dopis od 02.04.2026. godine, broj: T09 0 KTPO 0207593 25 a nakon izvršenog uvida, vratilo cio spis ovome sudu.

Obzirom da Kantonalno Tužilaštvo Kantona Sarajevo nije obavijestilo ovaj sud o eventualnim smetnjama za nastavak vođenja stečajnog postupka, to je stečajni postupak nastavljen u skladu sa odredbama Zakona o stečaju.

Cijeneći Izvještaj privremenog stečajnog upravnika, Javnim pozivom od 08.04.2026. godine pozvani su povjerioci i zainteresovana lica da u roku od 30 (trideset) dana od dana objavljivanja ovog poziva predlože otvaranje stečajnog postupka nad imovinom stečajnog dužnika Društvo sa ograničenom odgovornošću za promet i usluge "ČOKOS" d.o.o. Sarajevo, ul. Terezije bb privredni grad Skenderija, Sarajevo, Sarajevo-Centar, uz uplatu predujma za obezbjeđenje troškova stečajnog postupka u iznosu od 72.000,00 KM na depozitni račun ovog suda broj 1411965320009639 otvoren kod BBI Banke, da ukoliko u ostavljenom roku niko od pozvanih ne predloži otvaranje stečajnog postupka i ne uplati određeni predujam, sud će donijeti Rješenje o otvaranju i zaključenju stečajnog postupka, te da ako zainteresovana lica predlože otvaranje stečajnog postupka i uplate određeni predujam u navedenom roku, sud će otvoriti stečajni postupak i voditi ga u skladu sa odredbama Zakona o stečaju.

Isti je objavljen u Službenim novinama F BiH broj 32 od 29.04.2026. godine i izvršeno javno oglašavanje putem oglasne table suda i web stranice suda-elektronske table suda.

U ostavljenom roku a ni do dana donošenja ovog Rješenja nije dostavljen dokaz o uplati navedenog iznosa, niti je dostavljen podnesak kojim je neko od povjerilaca ili zainteresovanih lica obavjestio sud da će uplatiti traženi iznos predujma.

Odredbom člana 115. Zakona o stečaju je propisano da stečajni povjerioci mogu svoja potraživanja prema stečajnom dužniku ostvarivati samo u stečajnom postupku.

Na osnovu Izvještaja privremenog stečajnog upravnika utvrđeno je da stečajni dužnik duži vremenski period nije imao poslovnih aktivnosti, da su računi blokirani, da je ekonomsko stanje loše, da je poslovanje društva već duži period u potpunosti obustavljeno, te da nema imovine iz čije bi se prodaje mogli pokriti troškovi stečajnog postupka tj. nema stečajne mase.

Po Javnom pozivu od 08.0.2026. godine niko od pozvanih/zainteresovanih lica nije predložio otvaranje stečajnog postupka niti dostavio dokaz o uplati traženog predujma za pokriće troškova stečajnog postupka, pa obzirom da nema stečajne mase za pokriće troškova stečajnog postupka, niti je iskazana volja za predlaganje otvaranja stečajnog postupka a time ni predujmljivanje sredstava za pokriće troškova postupka, to sud nije ni provodio stečajni postupka tj. otvorio je isti, odredio upis zabilježbe rješenja o otvaranju i stečajni postupak odmah i zaključio shodno odredbi člana 102. stav 8. Zakona o stečaju, a nakon pravosnažnosti istog i brisanje stečajnog dužnika iz sudskog registra.

Odluka o objavljivanju otvaranja i zaključenja stečajnog postupka donesena je na osnovu odredbi člana 102. stav 8. i 107. Zakona o stečaju.

Odluka o brisanju pravnog lica iz sudskog registra donesena je na osnovu odredbi člana 108. stav 1. tačka b). Zakona o stečaju.

STEČAJNI SUDIJA
Nebojša Joksimović

Pouka o pravnom lijeku:

Protiv ovog rješenja dozvoljena je žalba. Žalba se podnosi Kantonalnom sudu u Sarajevu putem ovog suda u 3 (tri) primjerka, u roku od 8 dana po proteku 5 dana od objave rješenja u „Službenim novinama FBiH“.